

दिनांक 19.02.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- विधानसभा मांय माली साल 2025-26 रो बजट पेश करी ज्यो-प्रदेश रा विकास री केई घोषणावां करी ज्यी।
- सरकारी अर गैर-सरकारी हलकां मांय पौने तीन लाख भर्तियां रो ऐलाण, नुवा बणायी ज्या आठ जिलां रा विकास सारु एक हजार करोड़ रुपया रो फंड बणावण री घोषणा, चिकित्सा तंत्र ने मजबूत बणावण सारु ई केई प्रावधान।
- बजट माथे प्रदेशभर ऊं मिली-जुली प्रतिक्रिया मिली -मुख्यमंत्री भजनलाल शर्मा बजट ने सगळां रो विकास करण वाळो बतायो। विपक्ष रा नेता कह्यो-बजट ऊं जनता ने कोई साता नी मिली।
- प्रदेश मांय आज केई ठौड़ां हल्की बारिश व्ही अर तेज बायरो बाज्यो- कठे-कठे ओला पड़बा री शंका ।

000

उपमुख्यमंत्री अर वित्तमंत्री दीया कुमारी आज विधानसभा मांय माली साल 2025-26 सारु राज्य रो बजट पेश कीनो। बजट मांय नौकरी-धंधा, खेती-बाड़ी बाबत कर्ज, ईलाज रा सुबीतां रो विस्तार अर बुनियादी ढांचा ने बेहतर बणावण बाबत केई ऐलाण करी ज्यो। बजट भाषण रे दौरान वित्तमंत्री दीया कुमारी कह्यो के सरकार राज्य ने साढे तीन सौ अरब डॉलर री माली व्यवस्था बणावणो तैय कीनो है अर लारला बजट मांय करी ज्यो ऐलाण मांय ऊं 73 फीसदी रो काम पूरो कर लियो ज्यो है। विधानसभा रा बजट सत्र मांय प्रदेश रो पहलो ग्रीन बजट पेश करता थकां वित्त मंत्री कह्यो के ई सारु 27 हजार 824 करोड़ रुपया रो प्रावधान करी ज्यो है। और ब्यौरो समाचार कक्ष ऊं-

.....

राजीविका मिशन रा तैत महिलावां ने माली तौर ऊं खुद रे पाण ऊबी करण रा मकसद ऊं प्रदेश मांय 20 लाख लखपति दीदियां बणावणो तैय करी ज्यो है। आं मांय ऊं तीन लाख लखपति दीदियां आवता साल बणायी जावेला। बजट मांय महिलावां सारु पांच सौ ऊं बत्ता पिंग टॉयलेट बणावण रो ऐलाण ई करी ज्यो।

प्रदेश मांय सार-संभाळ अर संरक्षण री जरूरत वाळी टाबरियां सारु दस ठौड़ां गर्ल्स चाइल्ड केयर इंस्टीट्यूट खोल्या जावेला। आंगनबाड़ी केन्द्रां माथे बच्चां ने सप्ताह मांय 3 दिन ऊं बधा र 5 दिन दूध मुहैया करायो जावेला।

50 करोड़ रुपया रा खर्च ऊं फिट राजस्थान अभियान चलायो जावेला। ई सागे ई तकनीकी शिक्षण संस्थानां मांय खेल कोटो लागू करण रो ऐलाण ई बजट मांय करी ज्यो। राज्य री मौजूदा सरकार रो दूजो बजट पेश करता थकां वित्तमंत्री बुजुर्गा, विधवा महिलावां अर दिव्यांगजन री सामाजिक सुरक्षा पेंशन बधा र साढे बारह सौ रुपया प्रति महीना करण रो ऐलाण कीनो।

प्रदेश मांय हिफाजती तंत्र ने मजबूत बणावण सारु राजस्थान नागरिक सुरक्षा कानून बणावण रो प्रस्ताव बजट मांय करी ज्यो। सरदार पटेल सेंटर फॉर साइबर कंट्रोल अर वॉर रूम बणावण सारु साढे तीन सौ करोड़ रुपया रा खर्च रो प्रावधान बजट मांय करी ज्यो। आवता दो साल मांय पुलिस

महकमा ने एक हजार गाड़ियां मुहैया करावण अर पुलिस मांय साढे तीन हजार और ओहदा बणावण रो प्रस्ताव ई बजट मांय करी ज्यो।

बजट मांय सरकारी महकमां मांय सवा लाख अर गैर-सरकारी हलकां मांय डोढ लाख भर्तियां रो ऐलाण करी ज्यो। ई सागे ई राजस्थान रोजगार नीति 2025 लावण रो प्रस्ताव ई करी ज्यो।

.....
बजट मांय पांच सौ करोड़ रुपया रा खर्च ऊं विवेकानन्द रोजगार सहायता केन्द्र बणावण रो प्रावधान करी ज्यो। ई सागे ई साढे तीन हजार करोड़ रुपया रो मुख्यमंत्री आयुष्मान आरोग्य योजना कोष बणावण रो ऐलाण ई बजट मांय करी ज्यो।

.....
दूरदराज रा हलकां रा लोगां ताई ईलाज रा सुबीता बधावण सारू डॉक्टरां रा साढे 700 अर पैरामेडिकल स्टॉफ रा डोढ हजार ओहदा बणाया जावेला। नुवा बणायी ज्यो आठ जिलां मांय विकास सारू एक हजार करोड़ रुपया देवण रो ऐलाण बजट मांय करी ज्यो।

उपमुख्यमंत्री कह्यो के दो लाख और घरां ताई पाणी पूगावण सारू चार सौ करोड़ रुपया खर्च कर्या जावेला। विकास री रफ्तार और तेज करण सारू राजधानी जयपुर मांय मेट्रो रेल नेटवर्क ने और बधायो जावेला। 12 हजार करोड़ रुपया रा खर्च ऊं सीतापुरा ऊं टोडी मोड़ ताई मेट्रो रेल चलावण ऊं जुड़्या काम कराया जावेला। ई सागे ई बजट मांय जगतपुरा अर वैशाली नगर हलकां ने मेट्रो रेल रा सुबीता ऊं जोड़बा सारू ई डी.पी.आर. रो प्रस्ताव करी ज्यो। वित्तमंत्री बजट भाषण मांय परिवहन अर बुनियादी ढांचा रा विकास सारू केई ऐलाण कर्या। बजट मांय करी ज्यो ऐलाण रे मुजब प्रदेश मांय 9 नुवा ग्रीन फील्ड एक्सप्रेस-वे बणाया जावेला अर 15 शहरां मांय रिंग रोड़ बणायी जावेला। रोड़वेज ने 500 नुवी बसां दी जावेला। राजधानी जयपुर री यातायात व्यवस्था मांय सुधार री मद मांय अढाई सौ करोड़ रुपया खर्च कर्या जावेला। शहर मांय बीआरटीएस कोरिडोर हटाया जावेला। वित्त मंत्री वां रा भाषण मांय हर पंचायत मांय अटल ज्ञान केन्द्र बणावण री योजना री जाणकारी दीनी। इण ऊं डिजिटल शिक्षा अर सरकारी योजनावां री जाणकारी जनता ताई आसानी ऊं पूगायी जा सकेला। पंच गौरव योजना रा तैत साढे पांच सौ करोड़ रुपया रा काम कराया जावेला। पेश है बजट मांय करी ज्यो खास-खास ऐलाण री जाणकारी—

- रामजल सेतु लिंक परियोजना रा तैत नौ हजार तीन सौ करोड़ रुपया रा काम कराया जावेला।
- 25 हजार फार्म पौंड, दस हजार डिगियां, सूरज री रोशनी ऊं बिजली बणावण री पचास हजार मशीनां लगावण अर पाणत सारू बीस हजार किलोमीटर लम्बी पाइपलाइन बाबत नौ सौ करोड़ रुपया रो प्रावधान।
- पीएम किसान सम्मान निधि री रकम बधा र नौ हजार रुपया सालाना करण रो ऐलाण।
- गेहूं रा सरकारी मोल माथे बोनस री रकम बधा र प्रति क्विंटल डोढ सौ रुपया करण रो ऐलाण।
- स्वामित्व योजना रा तैत दो लाख पिरवारां ने जमीं रा पट्टा देवण री घोषणा।
- कोटा मांय खिलौना पार्क, निम्बाहेड़ा अर बूंदी मांय स्टोन पार्क, चित्तौड़गढ़ जिला रा सोनियाणा मांय सिरेमिक पार्क अर भीलवाडा मांय टेक्सटाइल पार्क ने और बड़ो बणावण रो ऐलाण।
- जयपुर रा सांगानेर मांय ब्लॉक प्रिंटिंग ज़ोन बणायो जावेला।
- पर्यटन विकास रा कामां सारू 975 करोड़ रुपया राख्यी ज्यो जदके नाइट टूरिज्म ने बधावो देवण सारू एक सौ करोड़ रुपया रो बजट।
- अलवर, बीकानेर, जयपुर, जैसलमेर अर कोटा मांय लड़कियां रा सैनिक स्कूल खोलण रो ऐलाण।
- पंचायत मुख्यालयां माथे अटल ज्ञान केन्द्र खोलण री घोषणा।

विधानसभा मांय आज पेश करी ज्या राज्य रा माली साल 2025-26 रा बजट माथे मिली-जुली प्रतिक्रिया मिली है। मुख्यमंत्री भजनलाल शर्मा बजट ने सगळां रो ध्यान राखण वाळो बताता थकां कह्यो के ओ बजट राज्य रो पूरो विकास तैय करेला।

.....
दूजी कानी विधानसभा मांय विपक्ष रा नेता टीकाराम जूली कह्यो के ओ बजट किसानां अर महिलावां रो भलो करण वाळो नी है।

.....
भीलवाडा रा सांसद दामोदर अग्रवाल बजट ने किसानां रो भलो करण वाळो बतायो।

.....
फैडरेशन ऑफ राजस्थान ट्रेड एण्ड इंडस्ट्रीज रा अध्यक्ष सुरेश अग्रवाल कह्यो के ओ बजट उद्योग अर नौकरी-धंधा ने बधावो देवण वाळो साबित व्हेला।

.....
बाडमेर रा मोट्यार जितेन्द्र चौधरी कह्यो के बजट मांय समाज रा सगळा तबकां रो ध्यान राख्यी ज्यो है।

.....
पाली जिला रा एक किसान पीएम किसान सम्मान निधि री रकम बधावण अर 35 लाख काश्तकारां ने खेती-बाड़ी सारू कर्ज मुहैया करावण ने चोखी पहल बताई।

.....
झुंझुनू जिला मांय मंडावा री डॉ. वंदना गौतम बजट ने महिलावां ने मजबूत बणावण वाळो बतायो।

000

मराठा राजा छत्रपति शिवाजी री जयंती रे मौके आज प्रदेश मांय न्यारा-न्यारा कार्यक्रम राख्यी ज्या। जयपुर रा राजभवन मांय राख्यी ज्या कार्यक्रम मांय राज्यपाल हरिभाऊ बागडे अर मुख्यमंत्री भजनलाल शर्मा ई शिरकत कीनी। कोटा रा शिवाजी पार्क मांय राख्यी ज्या कार्यक्रम मांय लोकसभा अध्यक्ष ओम बिरला कह्यो के शिवाजी महाराज री सोच प्रेरणा देवण वाळी है। पाली मांय शिवाजी सर्किल माथे शिवाजी री मूरत माथे माळा चढ़ा र वां ने याद करी ज्या।

000

प्रदेश रा दस जिलां मांय आज आंधी चालण अर बिरखा व्हेवण सारू चेतायी ज्यो है। मौसम केन्द्र जयपुर रे मुजब कठे-कठे ओला पड़बा री ई शंका है। काल ई ऐडो ई मौसम रेहवण रा आसार है। 21 फरवरी ऊं पारो चढ़बा रा आसार है। ई बीचे आज श्रीगंगानगर मांय छांटो-छिड़को व्हयो। चूरू, सुजानगढ़ अर आरे-सारे रा हलकां मांय ई हल्की बरसात रा समाचार है। दूजी कानी डूंगरपुर, जोधपुर, जालौर अर बाडमेर समेत केई ठोडां हल्की गर्मी रही।

000

जनता ने देश री माली व्यवस्था रा बारा मांय आंकड़ा मुहैया करावण सारू भारतीय रिजर्व बैंक 'आरबीआई डेटा' नाम री मोबाइल एप बणायी है। आरबीआई रे मुजब ई एप ऊं देश री माली व्यवस्था ऊं जुड़ी जाणकारियां री 11 हजार ऊं बत्ती श्रृंखलावां मुहैया करायी जावेला। इण रे जरिये मिलण वाळा डेटा डाउनलोड ई कर्या जा सकेला। एप रे जरिये आरे-सारे रा 20 किलोमीटर हलका मांय बैंकिंग सुबीतां रा बारा मांय ई जाणकारी मिल सकेला।

000